

四庫全書

史部

欽定四庫全書

欽定勦捕臨清逆匪紀略卷十三

庚寅

舒赫德阿思哈楊景素奏言查已獲之王倫等親族頭目及續獲各要匪自應即日分別辦理以昭炯戒內解陶景淑艾得見李玉珍邵然趙大坊趙煥趙玉佩李得深楊佩等十犯或係王倫義子助賊為惡或係搶奪王倫殺害職官俱屬罪大惡極

應凌遲處死又楊峻德楊立祥李達楊偉徐克明
張伸張發祥盧高黨耀汗劉世充王宗林王宗興
王進忠閻吉瑞閻斐然閻宗禹等十六犯或係充
當探馬或係首逆親族並隨同佔住臨清亦法無
可貸均應斬決臣等已將該犯等分別正法並令
居民環視以彰

國法而快人心至王倫等之妻女姊妹義女并不及
歲之親姪等共三十三犯應照例給功臣之家為

奴現俱解送刑部辦理

同日又奏言臣等查九月十二日惟一共帶綠營兵四百五十五名除陣亡九名外尚有四十名未回此等臨陣退怯之兵自應遵

旨即速查拏究出為首倡逃者十餘人正法示衆其餘隨同潰散者亦當查明發伊犁等處給兵丁為奴以昭炯戒再九月初七日徐績在張四孤莊柳林等處打仗共帶綠營兵六百四十二名內陣亡九

名未回者有一百四十八名亦應一體嚴拏辦理
臣楊景素現已飛飭文武官員上緊跣弋如獲有
倡逃之兵即于所拏地方訊取確供一面奏

聞一面正法奏入

上命軍機大臣傳諭舒赫德楊景素曰據奏審辦逆匪
案犯所擬凌遲斬決俱屬允協至逆匪緣坐家屬內
王正月兒係王經隆之子雖年僅二歲但王經隆與
王倫同日起事逆惡重犯豈可復留遺孽著交刑部

監禁其王倫新擄之妻王張氏等均給功臣之家為
奴又所稱賊犯中有報知王倫等住處之顏文韶鄭
乾二犯尚無與官兵打仗之事且能逃出報信情有
可原自可貸其一死但究係曾經從賊不便仍留本
處應酌發雲貴川廣地方充軍又另摺所奏潰兵如
此之多實為可恨若僅查拏倡逃之十餘人正法尚
不足示儆自應嚴拏務獲多辦數人以肅軍紀餘亦
當分發伊犁及烟瘴等處不可稍存姑息

同日

上又命軍機大臣傳諭舒赫德楊景素曰今日令軍機大臣研訊各犯據王經隆等供出有陳合璧是王倫徒弟在恩縣招有四五十人入教內有石姓褚姓等語陳合璧係招人入夥之犯現在曾否拏獲褚姓是否即係褚文石姓又係何人著即查明奏覆再李旺供稱京兵消息是季國貞妹夫馬姓在油坊探知報信又據王經隆等供有王倫族姪王有管辦食用并從

壽張帶來廚子劉國安閹二小二名俱著一併嚴拏
務獲

同日舒赫德阿思哈楊景素奏言前據姚立德稱
東昌等處陸續獲犯一百二十二名內除審訊明
確分別正法發遣釋放外尚有甫經解到十九犯
現在監禁臣等隨行文將各犯提至臨清嚴加審
訊除張獻都先經身故戮屍外其楊林楊富魏希
孟王四譚富韓副如曹文科七犯或為賊頭目攻

打城池或看守賊寨代為送箭均屬法無可貸即
應正法又王經全之胞兄王經林胞叔王曰成王
曰前冀盤佑之胞叔冀景玉等四名雖訊與王經
全冀盤佑向各分居不知逆情但究係賊匪親屬
應咨部發遣烟瘴其趙大哲王振山謝順禮李全
等四犯俱係被賊擄去于大兵未到之先乘間逃
出並未從賊又閭家臣閭曰公訊係閭吉祥之無
服族叔任玉係李士傑族兄李世榮之僱工人俱

無入教之事應予省釋奏入報

聞

同日又奏言查烏大經已補授臨清協副將所遺
德州叅將員缺亦屬緊要臣舒赫德素知武靈阿
向在西路出兵行走尚好應即令其陞補德州營
叅將並暫行兼管德州城守尉事務奏入報

聞

同日周元理奏言臣查直隸與東省交界州縣前

聞逆匪肆擾閭閻無不切齒痛恨召集鄉勇共圖
守禦其大名廣平一路各村莊集有鄉勇五六百
名清河威縣故城等處各城堡亦俱集有千餘名
并西岸官兵札營地方東省民人前來擔水送草
者不少而直隸清河縣士民復有呈送牛羊豆草
等物至大學士舒赫德處以備犒賞者此等輸誠
効義急公奉

上之民實由

聖治化成漸摩日久天良感發出自性生現已札知各州縣分別查明獎勵臣于初八日審辦各要犯事畢即起身仍由臨清西岸稽察順赴大名廣平一路巡查回省奏入報

聞

臣等謹按直隸毗連東省州縣聞奸匪滋擾憤切同仇城堡鄉莊團集守禦無慮千百餘人如館陶縣文生趙之枚武生王建基等率領居民

保村殺賊而清河士民備具牛羊豆莖諸物赴
軍前呈獻急公踴躍發自至誠

皇上嘉其深曉大義

諭令分別獎賞其文武生員既

特予教諭千總職銜至鄉民中之首先倡率者並給扁
以示旌揚直隸督臣奉宣

德意士民聞

命之下感勵益深奸慝除而良善長蒙其福有不爭奮

於蹈德詠仁者乎

同日又奏言臣拏獲逃匪餘犯逐一研訊內王進忠閻丹信張大臣張文貴黑茂王玉丁先七犯隨同攻城打仗各一次王慶喬富梁見王法起孫華五犯隨同搶劫村莊各一次均應斬決運吉昌李明朱克叙馬陞宋添長五犯均為賊守口照料情節可惡亦應一律斬決以上各犯業經綁赴市曹正法其張大妮孫可茂張有本王山伊讓張同許

澄七犯為賊服役未久均應發遣伊犁及烟瘴地方王十賈秉有二犯仍在舊城照常買賣並及早逃出又幼孩潘魁一名雖年僅十四但曾供賊使令亦應一併發遣郭四王智二犯據供十八二十等日賊人搶擄伊妹並將伊拘入為時未久且並未為賊服役現已合家被難又徐追才何二小霍八崔豹四名初因形跡可疑被拏今據供並未從賊又趙羣一名年僅十三被擄亦止二日均應

解回東省查明省釋奏入報

聞

辛卯

上諭內閣曰舒赫德所請發往山東以道府用之忠德赫紳泰俱著馳驛前往

同日

上命軍機大臣傳諭舒赫德楊景素曰前據徐績奏逆匪侵擾三縣時在壽張縣殺害知縣及署遊擊陽穀

縣殺害縣丞典史堂邑縣殺害知縣今復訊之各賊
犯據梵偉閻吉仁供我們到壽張縣衙門知縣從署
內出來我們叫他順從喊罵不依是劉煥馬成龍景
淑動手把知縣殺了李世傑說他是個好官將氈子
包裹掩埋在衙門裏知縣並無女眷等語又據王經
隆供堂邑縣官知我們在張四孤莊殺人放火把
我妻子拏在監裏我們進城時縣官在城上巡查王倫
於北門上拏住縣官和他兄弟他們不肯順從就綁

縛擡到北關外打了縣官一頓棍到一更多天把他兄弟兩個都殺了亦無家眷等語是該二縣俱被執罵賊而死克守臣節亦屬可憫其從前即有辦理不善之處尚可相抵著舒赫德楊景素再行確查如果屬實即奏聞予以卹典若能詢得該知縣掩埋之所并著楊景素驗明另為給棺盛斂聽其本家領回至陽穀縣殺官一節據王經隆供我們到陽穀縣衙門縣官不在家劉發郭永教把他家口殺了別衙門的

人都跑出來我們那日殺了許多人不知有官沒有等語是陽穀縣縣丞典史被害之事據賊所供並無確證而知縣家眷被賊戕害該縣係何人因何不在署內並著查奏又賊供進壽張縣城先到遊擊衙門有閻吉仁之兄閻吉智現在當兵送信令遊擊走避我們將閻吉智殺了又到守備千總衙門亦皆不見等語所供與徐績原奏不符是該遊擊與縣官被害者不同即或畏懼自戕亦非罵賊不屈可比若竟逃

避偷生則其罪更浮於惟一斷不可姑寬著舒赫德
楊景素即速查獲訊明奏聞正法至徐績初奏以守
備正在沿河催漕是否屬實其千總又復何往并著
一併查明覆奏再壽張動手戕官之各賊犯除已傳
諭東省查拏外尚有王槐劉發二犯並著楊景素即
速查拏審明從重辦理

同日舒赫德阿思哈楊景素奏言臣等遵奉

諭旨查辦堂邑跪迎賊衆男婦于審訊各獲犯中隨時

跟究今訊得魏希成堂邑縣魏家莊人本年六月間入教九月初四日王倫到城南三里莊有本縣陳家莊人陳緒糾同跪接隨至臨清彼時共百餘人內有認識者係魏世載王貴王純蘓連望蘓連城數名其魏世載王貴俱已被拏臣等因即提該二犯嚴訊俱供係堂邑縣人同在三里莊跪接王倫並跟到臨清又據王貴供亦係陳緒糾合是陳緒一犯實為首倡跪迎之人自應嚴拏重辦但查

姚立德送到正法各犯冊內已列該犯姓名并註
明陳家莊人至魏希成王貴俱曾為賊攻城魏世
載跟隨入教為賊喂馬且自堂邑同至臨清俱屬
法無可貸應請

旨將魏希成等三犯即行正法其同時跪接之王純蘓
連望蘓連城自應嚴切查拏再前訊劉君愛供係
王聖如姊夫入教已有三年九月初五日王倫到
柳林時同楊二記臉郭濟美傳喚同莊人去跪接

查劉君愛已列逆匪夥黨項下奏明正法郭濟美
前據姚立德解訊之曾文科供稱中鎗身死惟楊
二記臉一犯現在一體搜捕至此種入教迎賊之
人大槩多隨至臨清現經官兵燒殺諒已不少嗣
後續獲各犯中有訊出此種情節者再行分別定
擬奏入報

聞

同日又奏言臣等查賊中有歸岱一犯又稱歸太

現未就獲當嚴飭文武各員留心偵捕至季國貞
久經拏獲其李忠一犯雖據直隸總督周元理轉
解臨清但訊係徐克明奏明在案又查武生吳兆
隆一犯經臣等

奏明與武舉劉陶文生楊榮華一併問擬正法候
旨遵行今楚偉供出吳兆隆有設計燒城搶船搭橋等
事實屬罪不容誅臣等復加窮詰該犯于主謀一
節總未吐供并稱伊子吳士偉被官兵拏獲殺死

臣等詳查正法冊內並無吳士偉姓名難以憑信
再當嚴捕所有季國貞吳兆隆二犯現在奉

旨解京其劉陶楊榮華身為紳士竟敢從賊或亦有應
行訊究之處臣等現將季國貞等四犯一併解京
奏入報

聞

同日舒赫德奏言臣前在德州時有中書沈啓震
前來進見稱係丁憂回浙舟滯德州知臣赴東勦

賊願隨行出力臣此次帶出滿漢司員無多而事務繁冗不敷辦理沈啓震向在軍機處行走臣素知其熟諳因留其同至臨清幫辦一切俟事竣後仍送其回籍守制沈啓震自隨辦以來頗為出力理合奏

聞奏入得

旨俟其服滿時提奏

壬辰

舒赫德阿思哈楊景素奏言查閤吉祥一犯已解
京備訊其解陶張立祥二犯同楊峻德等二十六
名及東昌解到七犯俱遵

旨正法至王倫之義兒十八人經臣等歷訊各獲犯所

供並無趙元其人嘉謨處所開之趙春李仲林直
王自正四名亦從未據各犯供及其李仲或即前
在油坊打仗未獲之李忠林直或即與王倫結拜
兄弟已死之林哲其字音相近嚴訊之下因而混

供亦未可定至李裕國即李玉珍并柱即景淑李
姓二人當即是李世傑李得深而所稱王姓則祇
有王經隆一人臣等細行查對如王經隆閻吉祥
李桐三犯已經解京李玉珍艾得見邵然趙大坊
趙玉佩景淑李得深八犯已經正法丁若錦李贊
一李世傑三犯已受傷身死張百祿一犯已行知
河南查拏溫炳趙傳二犯現在訪緝惟單內徐足
一犯臣等前訊據各犯俱稱王倫義兒尚有郝舉

現亦嚴行查捕郝舉與徐足音亦相近或即其
人臣等既經對明則嘉謨處所訊之供似未為可
據又李旺所供蕭連城張居仁二犯除張居仁即
張善長已據東昌續獲解到訊供外其蕭連城一
犯臣楊景素現在開明該犯住址飛速查拏俟獲
到一併嚴辦奏入報

聞

同日又奏言前據姚立德解到東昌拏獲賊匪楊

富供稱臨清官兵從土城東門入有張善長歸太
逃出臨清北門昨據登萊青道王站住送到續獲
賊犯印冊查有張居仁即張善長一犯在內隨即
飛提嚴訊據供係臨清州人於三十八年八月內
有城南大水坑居住之李振前來引誘隨於二十
九日入教王倫封為刑部官寫字管賬並不打仗
九月二十三日官兵到來我同冀國太郝燦等逃
出北水門去遇著歸太帶有七八百人在塔灣向

官兵打仗被官兵殺了數百他們敗走小的隨著
望東逃去歸太說往河南去調兵我逃到高唐州
就被拏獲等語是張善長一犯係與歸太同逃歸
太并有往河南之說臣等因即飛咨何燭囑其密
速查拏至張善長母妻子女及所供引其入教之
李振並同逃之冀國太郝燦臣楊景素現在上緊
緝奏入

上命軍機大臣傳諭舒赫德周元理何燭楊景素曰據

舒赫德等將李貴李桐閣吉祥解送到京訊據李貴
供王倫未起事時曾於八月望後差歸太進京探聽
動靜至九月二十日歸太帶一人來見王倫說名于
瞻海從京裏來聽得發兵一千到山東王倫就令梵
偉吳清林李忠等帶兵七八百迎拒被京兵敗了回
來于瞻海是柳林人王倫收他隨營後來不知下落
今據舒赫德等奏訊據張居仁供九月二十三日逃
出北水門遇著歸太說往河南去已飛咨何燭密速

查拏等語歸太一犯逃往河南供証確有可據著何
煇卽速嚴緝拏毋任漏網至于瞻海係柳林人自應
交楊景素在山東嚴緝但該犯曾經歸太引令入夥
或隨同逃往河南亦未可定並著何煇一體嚴緝又
據李貴供張百祿是孟燦外甥常往河南收徒弟聞
得有遂平縣中劉姓三人還有孟燦女壻亦在遂平
居住俱不知姓名是遂平傳教之說業經賊犯供明
必非虛妄何煇務須實力查拏勿使地方官顛預了

事又據李桐供搶奪王倫時林哲之弟林浩在內又
王倫之弟王淑尚無下落又李忠亦係案內要犯直
隸所拏李忠既訊係徐克明則李忠現在何往並著
楊景素一併查拏嚴審重究恐有竄入直隸境內者
周元理不可不留心協緝其有情節較重之犯即解
京訊問所有應拏要犯並令徐績盡心躡緝以期自
贖再臨清舊城逆賊佔踞半月有餘經官兵勦捕殲
戮甚多亦有該處居民被賊殺害者前據舒赫德奏

舊城街巷賊屍填積塞路昨楊景素奏舊城居民歸還者已四千餘戶自仍須聚處於此若令屍骸積久穢氣鬱蒸春融以後恐易染成疾疫不可不速為妥辦著舒赫德楊景素擇一離河稍遠平敞地面無礙田廬者刨兩大坑分別男女屍身投擲其中即以燼餘瓦礫填擁成堆雖不必如鯨鯢京觀之封而作大冢以昭炯戒亦可使人見而知儆且街衖并得肅清如實有良民為賊所害其家屬還歸尚能識認願領

回殯葬者查明亦聽其便

臣等謹按逆匪擾踞臨清自取誅滅經

大兵迅勦駢戮聚殲彰

國法而攄衆憤我

皇上睿慮周詳以居民漸次復業恐舊城以內積骸過多街衢未能清肅

命擇離河稍遠無礙田廬之地分掘兩坎投擲賊屍壘成大冢法紀既申仍得免於暴露且俾凶頑者

永知儆戒從此閭閻安堵自無疾癘之虞

聖天子懲惡寧民洵無微不至已

同日楊景素奏言現在逆匪勦除回空糧艘銜尾

南下經臣奏蒙

聖鑒一面委官催趲晝夜遄行茲于十月初十日回空

湖南三幫江西十三幫俱已全過臨清水手短絳

人等極為安靜並無勦餘賊匪改裝混入臣仍嚴

飭沿河文武員弁乘此天氣尚暖速行催趲出境

奏入報

聞

同日又奏言前臣率領直隸兵弁在臨清河西堵截逆匪其時臨清之三汊河為賊西渡要口聞該處回人洪印等素稱勇悍是以令回兵白虎等即隨同都司張世富一同勦賊實屬奮勉出力已於

奏

聞後遵

旨賞給洪印洪全銀二百兩白虎拔為把總嗣臣把守
臨清河西大學士舒赫德帶兵在河東舊城勦殺
初次不過令二三十人引路餘俱未用况洪印等
業已仰承

天恩似可毋庸再行賞給現擬出示獎勵俾知勸勉奏
入報

聞

同日又奏言自逆匪擾害屯聚臨清仰蒙

聖恩調遣勁旅尅日勦平臨清城鄉內外百姓扶老攜幼均各還家民情寧貼遠鄉亦無逸賊所有駐臨弁兵除京兵津兵及青州德州滿兵現經舒赫德酌量請

旨撤回外其山東綠旗營兵久駐臨清亦已無事臣與舒赫德面商酌擬撤存查撫標存營兵二百七十九名除徐績赴柳林搜捕餘賊帶兵一百名外尚存兵一百七十九名請俱留臨清至兗鎮存營兵

一千三百十九名請酌留六百名其餘九百十九名應請撤回登鎮存營兵一千三百名路途較遠本處海疆亦關緊要應請全行撤回臣擬俟京兵撤回後即將兵弁酌量遠近分作三起按日起程奏入報

聞

同日又奏言

臣接奉

諭旨遵即查明臨清新城內共有本年地丁漕項錢糧

四千七百五十六兩零內已完銀一千一百一十二兩零未完銀三千六百四十三兩舊城內共有本年地丁漕項錢糧九千八百二十兩零內已完銀二千六百六十一兩零未完銀七千一百五十九兩零其從前並無借欠銀兩臣查新城百姓同文武官保護城池能知大義且守城日久未免多費口糧芻秣所有未完本年錢糧三千六百四十三兩零可否全行蠲免出自

聖恩至舊城居民凡從賊抗拒及為賊供役之人俱已
勦戮治罪外其實在良民或屋被焚燒或家被搶
掠所有本年未完錢糧七千一百五十九兩零並
請

聖恩蠲免十分之五至臨清城外被害鄉莊并壽張陽
穀堂邑三縣城鄉之處所有本年應完并帶徵錢
糧及臨清舊城蠲剩錢糧並懇

聖恩緩至明歲秋收後起徵以紓民力又臨清壽張陽

穀堂邑城鄉被害之處民間秋收貯蓄多被搶掠
耗散小民辦理漕糧不易臣仰體

皇仁擬將該四州縣被害之戶所有本年應徵漕糧緩
至明歲秋收後起分作二年帶徵以裕歲內民食
更沐

高厚聖恩于無既所有遵

旨酌擬臨清等四處分別撫綏事宜謹繕摺奏

聞奏入

上諭內閣曰此次逆賊王倫等糾衆攻擾臨清等處經舒赫德等統率八旗勁旅彌月即為勦平其新城居民能隨同地方文武盡力守禦殲賊保護無恙實屬可嘉至舊城居民賊至遠避事平挈眷還鄉者皆係守分良民室廬蕩析生業未免蕭條又壽張堂邑陽穀三縣或人被賊戕或屋被賊燬及家計為賊搶掠者均堪憫惻特降旨令該撫楊景素查明具奏候朕降旨加恩今據楊景素據實分別查明覆奏著加恩

將臨清新城內本年應徵地丁漕項錢糧除已完外
所有未完銀三千六百四十三兩零全行蠲免以獎
善良其舊城內實在良民未從賊者所有本年未完
錢糧七千一百五十九兩零並著加恩蠲免十分之
五至臨清城外被賊擾害鄉莊并壽張陽穀堂邑三
縣城鄉經賊被害之處所有本年應完正賦並帶徵
之項及臨清舊城蠲剩錢糧槩行緩至明歲秋收後
起徵以蘇民困至臨清壽張陽穀堂邑城鄉等處民

間貯蓄多被賊匪搶掠小民無力辦糧並著將該四
州縣守城及城鄉被害之戶所有本年應徵漕糧俱
緩至明年秋收後起分作兩年帶徵俾歲內民食得
以寬裕該撫其董率妥為經理以副朕矜卹安良至
意該部遵諭速行

臣等謹按臨清居民守護新城奉公盡力而舊
城及壽張等邑被賊戕毀生計亦未免蕭然仰
蒙

特沛恩綸普霑渥卹或蠲免正賦或緩帶秋徵自城邑
以至鄉莊靡不徧逮用蕪困敝而就安恬小民
驚竄甫定已沐浴於

聖主和甘之澤矣

同日楊景素又奏言逆犯王倫等邪教惑民謀為
不軌一案臣親提現獲人犯逐一嚴訊查有臨清
州武生吳兆隆堂邑縣生員楊榮貴二名經解京
逆犯王經隆等供稱攻打臨清州時吳兆隆設法

燒城並搶船搭橋等語現在將吳兆隆遵

旨解京並將楊榮貴一併起解在案伏查教職一官約束士子是其專責平日不能實心訓教以致該生等不明大義甘心從賊咎無可逭除堂邑縣訓導吳璫業經罵賊被殺外所有臨清學正孟毓燦訓導李世璐堂邑縣教諭楊埒僑相應請

旨交部嚴加議處以肅

功令至山東學政李中簡亦應一併附叅聽候部議

奏入得

旨該部察議具奏

癸巳

上諭內閣曰壽張堂邑兩縣知縣現訊解京各賊犯據供該二縣被賊擒縛逼其順從皆罵賊不屈為賊戕害等語壽張知縣沈齊義堂邑知縣陳枚俱能罵賊而死克全臣節深合守土之義甚屬可憫至沈齊義未能先事覺察及訪拏時又復機事不密致賊黨聞

風生變雖亦不能辭咎而既以身殉亦可相原沈齊義陳枚俱著加恩交部照陣亡例議卹又昨據楊景素奏堂邑縣訓導吳璵亦罵賊盡節並著該撫查明交部一併議卹

臣等謹按人臣守土之責貴乎弭盜未然使奸民無由竊發若不能先事豫防致賊匪肆行擾攘固已咎無可辭

皇上加意矜全如壽張令沈齊義於查辦邪教一事始

失之優柔寡斷繼由於不密害成以致釀成事
變禍實自取乃猶

念其罵賊捐軀尚稱盡節以及堂邑令陳枚訓導吳琛
於致命遂志之義均為無忝

特予一體

恩卹以示褒揚寬其應得之謚獎其克全之節
聖人善善從長權衡至當信無錙黍之或爽云

同日

上諭內閣曰逆匪王倫等糾衆滋擾佔踞臨清因東省
綠營懦怯無能持選健銳火器二營兵千名派額駙
拉旺多爾濟都御史阿思哈帶領勦捕並令大學士
舒赫德統率經理未決旬而一舉蕞事逆黨要犯生
就殲擒伏法而賊首王倫亦畏罪自焚斃命驗有實
據若非選派京兵前往安能迅速若此所有出力各
兵及帶兵各員等業於起程時加恩賞賚其春寧音
濟圖巴圖保等亦節經施恩賞擢至舒赫德調度有

方拉旺多爾濟阿思哈均能實力董率甚屬可嘉舒
赫德拉旺多爾濟阿思哈俱著交部從優議叙其協
勦之直隸總督周元理總督管河南巡撫何煇正定
鎮總兵萬朝興河北鎮總兵黃模亦俱在事奮勉並
著交部議叙

同日何煇奏言據署遂平縣知縣王斗樞稟稱在
縣境諸市店地方常姓飯舖中查獲張百祿供係
壽張縣人有兄張存良因販魚到遂平在姨親趙

雲風家居住我向在山東投張九傳為師學習拳
棒今年正月來遂平探兄住下九月內想回家探
母未到黃河涯劉家口官差不准過河就回太康
縣叔子張洪功家住了幾日來到遂平諸市店飯
舖就被盤獲等語臣查張百祿一犯先據逆犯王
樸等供稱在遂平傳教其為來豫勾引匪徒入夥
無疑今既拏獲則隨從附和之人自無難跟究現
已押解赴省臣飛飭在省司道先行公同密訊俟

臣回省徹底清查務使根株淨盡不留餘孽奏入
諭曰將此人速行解京毋致免脫慎之

上又命軍機大臣傳諭何燭曰據何燭奏業經遂平縣
盤獲張百祿訊取實洪已今派員解京審辦矣此外
國太一犯及孟燦女壻務須即速擒獲解京審辦如
訊得傳教之人確有姓名住址可據必須一併搜拏
即無從賊謀叛情由亦應照邪教例從重發遣其或
未經供出者轉不必過于搜索以致節外株連但查

拏邪教之事固不可稍涉張皇致良民畧有驚擾尤忌機事不密如壽張羣逆之先發制人何焯老成練達自能調度得宜毋縱毋枉

甲午

上命軍機大臣傳諭舒赫德楊景素曰昨審訊逆賊夥犯據稱賊衆初進壽張城即至遊擊衙門因有步兵閻吉智豫先送信遊擊已經逃避等語遊擊係防守大員若賊至即逃以致城池失守其罪較惟一等之

ה'תש"ח - תש"ט

從署後走出喊叫兵丁拏賊並無一人來應等語兵
丁於各營將領理應竭力捍衛遇有賊人竊發尤當
相隨勦擊若營官喚令殺賊連呼不應非入教從賊
即怯避無能較之堂邑男婦跪迎王倫者情罪更重
不可不分別究治其係遊擊署內該班之兵應查明
發往伊犁等處為奴其在城防守者亦應革去名糧
重責示儆若查有從賊者即應在該處正法著舒赫
德即速同楊景素前赴壽張查辦勿稍姑息

同日舒赫德阿思哈楊景素奏言臣等訊問前跟
葉信同赴東昌之千總王廷佐據稱于九月初三
日隨葉副將赴壽張勦賊初四日行至東昌季海
務地方經東昌府知府季世法都司多奇納差人
趕回東昌守城初五日辰時賊匪有來臨清之信
復隨葉副將于是日三更回至臨清土城查照兵
丁葉副將未曾回署初六日子時進磚城防守並
未出城等語臣等質之署臨清營都司張鎡復提

葉信再四詰訊俱屬相符查葉信于初五日回至臨清未曾進署現據千總王廷佐等所稱似為確實再查葉信家眷搬往糧船一節現在奉

旨傳諭何燭查詢衛千總趙亮其有無于初五六日回至土城面托搬眷下船之處經趙亮處証明情節自無從遁匿奏入

上命軍機大臣傳諭舒赫德楊景素曰據舒赫德奏葉信于初五日回至土城並未進署初六日即進磚城

防守是其罪尚屬可諒今聞伊已于十二日病故亦屬可憐應准其家屬將屍棺領回但葉信于訊供次日即行身死或果係積勞羸弱難以久延抑係別有通信伊家搬避之處恐日後敗露畏罪自戕著舒赫德即速查明據實覆奏至前諭舒赫德勦捕逆賊事畢即往壽張陽穀堂邑等處查勘被賊情形并將堂邑跪迎賊衆各犯查辦近日審訊賊犯據供跪迎男婦俱已隨往臨清計官兵勦賊之時此等非殪於鎗

矢即擒獲治罪未必復能倖免即有仍留本邑者此時豈肯自認不辭旁人亦未肯投首告訐是查辦本為不易且愚民無知未免轉生疑畏此事可毋庸再辦舒赫德竟當回至德州查辦駐防潰兵之事將首先倡逃者訊確即行正法附從同潰者發遣新疆為奴並將此等人犯削除旗籍至陸續自回本營者如訊無潰逃情形仍准留存當差但亦須逐一鞭責示儆此必須舒赫德親駐德州俟新任城守尉福保到

日即督同查辦並將該處補缺等事妥協經理

同日舒赫德阿思哈楊景素奏言臨清當賊匪殘掠之餘鄉城百姓生

諭旨加恩撫恤并准部議令臣楊景素派委妥幹大員

確切查明辦理茲查布政使國泰料理德州軍需事竣現在臨清臣等公同酌議請即委該布政使暫住臨清專辦一切撫綏事宜令其親身往來各屬董率州縣實心經理以藩司統領各官查辦自

能得力臣楊景素仍隨時查察務使被難窮民均沾實惠如官吏等有不能實力奏行致有侵蝕滋擾情弊立即叅劾治罪布政使國泰應俟撫恤事竣即行回省奏入報

聞

同日又奏言查徐績前赴壽張陽穀一帶搜捕餘孽拏獲王倫堂弟王桂王林并案內正犯郭延貞郭林五李有典牛奉如林庚辰及郭進美之母任

氏妻孫氏溫炳之妻董氏等二十三名口帶至臨
清現在審訊辦理另行具

奏外臣等復提集各州縣獲解賊黨及附近鄉民執
縛送官之逆匪訊據各該犯供稱逆賊心腹人等
都在舊城內緊隨王倫逸出者頗少等語所供固
不足憑但思二十四五六等日搜捕賊黨正在打
仗之時所獲人犯將及二千俱在營盤外露地看
守兵丁又少恐有疎失是以將實係賊黨并受傷

垂斃者略問姓名住址即行正法未能細訊口供而舊城中之賊經鎗礮擊斃及焚溺死者不可數計昨于居民陸續搬回之後臣等遣副將烏大經前往清理街道又經檢出屍骸現存者尚有五百餘具是從前屢次勦殺賊內或有現在查拏要犯亦未可定至於附近臨清及壽張陽穀一帶百姓被賊殘害恨入骨髓臣等于初七日將審明要犯三十三名押赴臨清城外分別凌遲斬決城鄉百

姓四面圍觀不下萬人無不歡呼稱快并聞遠近
鄉莊拏獻賊匪者所在皆有是百姓恨賊之心甚
為痛切必不肯寄頓窩藏又經臣楊景素分派文
武員弁分路嚴密查拏即有逃逸要犯亦斷斷不
能漏網此皆臣等目擊實在情形不敢不據實上
聞現在惟有密選妥幹員弁上緊查拏總期醜類無遺
以慰

聖念奏入

諭曰勉力為之以靖根株

同日又奏言

臣

等查惟一徐績兩處潰逃兵丁已

據實奏明飛飭文武各官跣戈但無專司督捕之人恐事無責成易致踈玩茲查有直隸現任遊擊調發山東補用之剛塔及直隸現任部司調發山東補用之黃端該二員在直隸時臣楊景素知其差委勇往辦事認真臣等現差剛塔催拏撫標逃兵又差黃端催拏兗鎮逃兵俱發給逃兵年貌住

址清冊各處跟究查拏臣舒赫德亦一面嚴催直隸總督河南巡撫一體嚴緝奏入報

聞

乙未

上命軍機大臣傳諭周元理曰前據周元理奏查審拏獲各犯將陳珣周振樂周振德三名遽行釋放辦理未為妥協恐周元理意存姑息因降旨嚴飭並令將各犯解京交軍機大臣會同刑部審訊今據奏覆訊

陳珮等三犯實因恐被殺害隨行二日旋即相約藏匿伺隙投出均無隨賊打仗等事其情自屬可原已諭令仍釋放回籍是周元理前此所擬尚未舛誤但彼時賊未勦平逆黨要犯均未就獲何妨將各犯暫時羈禁俟東省捕賊事竣再為分別請旨乃周元理遽請釋放實屬急遽無序但究非圖積陰功輕為開脫其辦理不善之小過尚可諒也

上又命軍機大臣傳諭舒赫德楊景素曰昨令軍機大

臣研訊各犯據閻吉祥供九月二十六日夜間同王倫下樓泅水過河時尚有閻大成一犯隨同行走又據馬德供出有張四孤莊劉三是王倫夥黨招人入教又江三供出李旺帶著許多人到臨清野莊地方叫我們過劫我莊上的常老輝就帶著我順從李旺見王倫的本日又訊據季國貞供商量搭橋等事有韓裕功郝之光帶人去搶糧船五六隻各等語閻大成劉三常老輝韓裕功郝之光俱係應行拏究之人

不可任其漏網并著舒赫德楊景素等嚴行查緝務獲

欽定勦捕臨清逆匪紀略卷十三

欽定四庫全書

欽定勦捕臨清逆匪紀略卷十四

丙申

舒赫德阿思哈楊景素奏言館陶縣文生趙之枚
武生王建基等率領鄉民殺賊查係林潘寨鄉民
二百十六名李官莊鄉民二百五十二名共計四
百六十八名臣楊景素已飭館陶縣知縣陳培敬遵
旨動用庫項按名給賞銀兩理合奏明奏入報

金史卷之八
卷十四
聞

同日又奏言查臨清城內藥鋪王倫封為御醫一節臣等前奉

諭旨即查有二閘口開藥鋪之醫生遲玉津現在故城經臣楊景素差弁緝獲解到嚴加詰訊據供在臨清土城內居住素習外科行醫賊到臨清後被縛到盧家藥鋪裏要與他看傷我因將鋪內所有膏藥陸續給他貼過後即乘空逃回至官兵入城殺

賊我同原任千總程際林并街民林玉安等八人在西夾道空房內拏過賊人三名交到營內當初賊人徐範原有將來封你做御醫之語實在並無其事亦並未與王倫看病等語臣等又傳訊千總程際林及街民林玉安等并將拏獲賊犯冊內查對註有程際林協同鄉民遲玉津等拏賊三名字樣姓名數目俱屬相符查遲玉津已供稱為賊治傷又曾有徐範封為御醫之言即難保實無其事

未便以逃回後曾經協力拏賊遽行寬宥應行解京質訊至程際林及林玉安審無從賊情事且詢之賊人均未識面似應省釋奏入報

聞

同日又奏言臣等奉

旨查拏李國貞妹夫馬姓在油坊探信一節隨訊據李國貞幼妹四兒供稱有姊夫馬光德現在投到營裏臣等即將馬光德拏到研訊據供係四川人父

親原任臨清衛守備已經身故賊進土城後我總
在家裏躲避後來要想逃走季國貞帶我送出北
水門被賊拏住盤問我哄他們說是打探消息的
後來聞官兵到隨即逃出投到營裏並未從賊探
信等供查馬光德一犯既詢係季國貞姊夫屬實
所供情節一面之詞殊難憑信相應一併解京以
便與李旺季國貞二犯嚴行質審奏入報

聞

同日又奏言據臨清州武生焦人傑等於直隸清河縣蘇家莊地方拏獲逸賊張在立押送行營并將同黨名字另單送閱臣等即將張在立飭發臨清州收禁并將單內有名人犯司貞等二十五人陸續全數查獲訊據張在立供係臨清州人被賊裹去曾跟隨賊營頭目劉四到焦人傑家裏搶過物件又替劉四將家眷搬送蘇家莊住下不曾再回臨清至司貞等二十五人都是平日會使拳棒

其實不曾從賊劉四已在睢家樓被官兵殺了等語又訊據司貞司圖王有禮等同供學習拳棒並未入教從賊查張在立隨同搶劫從逆顯然雖經畏罪潛逸亦應明正典刑請

旨即行正法至司貞等雖堅供並無入教等事但究非安靜良民應請各杖一百流三千里以靖地方又另獲徐海徐五十兩犯訊得徐海隨王經隆歷次攻城徐五十於張四孤莊起事之日即隨賊搶奪

城池又跟梵偉在臨清堵禦此二犯均係法無可貸應請

旨正法奏入報

聞

同日又奏言欽奉

諭旨李旺所供王貴係帶兵攻打新城要犯著即速查拏務獲解京審辦臣等查王貴一犯前正法一千二百名冊內已有同名者三人前訊東昌解來楊富

一犯供有王貴是我姊夫昨被鎗打透大約已死等語此犯似即李旺所供之王貴惟楊富先經正法臣等再於研訊別犯時隨時確查又奉

旨王經隆供燒樓時還有王宗尼與壽張年輕者一人亦跳下樓來被獲此二犯獲後作何著落查九月二十九日王倫焚樓自斃時王經隆於山墻跳出被獲之後又有王經隆之姪孫王峻愛自樓掉下訊供後因受火傷越日身死同時尚有一人因樓板

塌下墜地當即身死未能訊供似即係王經隆所
供王宗尼及壽張年輕之犯又奉

旨訊出幫同季國貞搶船搭橋之犯有郭永教高珍楊
福金會韓福如李之貴楊樹常楊希葉李達皮之楊
徐士姚王立松十二名亦係此案要犯必須拏獲重
究查郭永教等十二人除李達已經正法外楊福一
犯前東昌解來正法之犯內有楊富一名又續解
到楊福係館陶人雖嚴訊並無幫搭浮橋之事且

稱從未與季國貞等認識但一面之詞難以憑信
應請質訊季國貞其同往搭橋之楊福係往臨清
抑係館陶即可得其確據今將楊福一併解京其
韓福如一犯前東昌解犯內有韓付如亦經正法
在案其餘各犯當嚴行查緝又奉

旨查王倫徒弟陳合璧及石姓褚姓等犯查陳合璧前
經臣等派員往恩縣查拏尚無踪跡其褚姓石姓
二犯褚文供內有同在堂邑逃回之褚致遠又已

經正法冊內有清平石元一名臨清石純一名是
否陳合璧所招入教之人現在遍處訪緝務得實
據又奉

旨王經隆等供有王倫族姪王有慶管辦食用又從壽
張帶來厨子劉國安閭二小二名曾否拏獲臣等前
於九月二十六日拏獲張立祥等八名內有劉典
安一犯訊係從壽張縣跟來之厨子因其並非要
犯即已正法劉典安是否即係劉國安當與王有

慶閭二小等一併嚴緝至閭吉仁之子慙小兒拏獲時當即行正法其給與王倫銀鐲之當夥王登雲並王得朋供出之趙忠趙宣竇柱聶大成張心智等現在分派員弁一體嚴拏務獲奏入

諭曰此皆餘波即免脫一二諒亦不能滋事然楊景素不可存此心仍以嚴拏務獲為要

同日又奏言

臣等欽奉

諭旨查周元理所奏賊犯曲六供有劉法一犯現於各

處獲犯中訊出劉法供係陳緒引進從賊曾勸曲
六入教在馬市街打仗等語其為曲六所供劉法
情事相符已無疑義又據生員邢璘出首伊姪邢
成德供係臨清州武生賊人逼令隨去將父母妻
子都搬進舊城隨賊把守浮橋兄弟邢復德因從
賊被叔子邢璘活埋等語邢成德以武生從賊情
罪較重現將劉法邢成德解京備訊奏入報

聞

同日何燭奏言臣奉

諭旨查問千總趙亮是否葉信相商將家眷搬上糧船之處今據趙亮供稱九月初六日申刻千總糧船從臨清開行往衛輝候兌初七日早飯時忽聞賊匪來至土城擾害急督率舵工水手人役防禦賊匪保護船隻到晚尾船水手來報有葉副將家眷人口到船避賊因係上司家眷聽其住下初八日早見葉信大兒子葉宗岫問明緣由又聽得傳說

賊匪已將副將衙署燒了只得將他們帶到衛輝水次在臨清開船時從未與葉信見面並無相商搬帶家眷之事等語又據葉宗岫供九月初三日我父親帶兵剿賊總未回署初六日午刻有兵役來取令箭說父親於半夜回磚城防守倉庫城池初七日聽得外邊嚷說賊匪殺進大街來我扶著母親帶領家眷從沿河一路逃避走有二里路見河內糧船要想上船去躲那旗丁水手們就任我

們上在後面官船內那時不知運官是誰到初八日這千總趙亮回到船上我向他說了原委央他一路帶到衛輝等語謹將各供詞奏覆奏入報

聞

同日嘉謨奏言據海寧所千總謝恩在阿城盤獲逸犯滕山一名供係歷城縣人因往壽張探兄遇見王倫即被脅同至陽穀堂邑後到臨清押令攻城乘間脫逃又據嘉興幫千總王世伸在戴家廟

盤獲逸犯陳湘一名俱係臨清州人住居城南倉上莊有同莊之郭大郭三郭七郭浩等都是白蓮教九月初七日郭浩等領人到莊拏去入夥到臨清押令攻城兩次初十日逃出等情當將該二犯就近發交東昌府嚴行監禁奏入

上命軍機大臣傳諭舒赫德楊景素曰據嘉謨奏臨清有郭大郭三郭七郭浩都是白蓮邪教等語著舒赫德楊景素即行嚴飭查拏務獲審明照例辦理又王

倫之師張既成墳塚屍棺已經驗明剉毀其張既成之師袁公溥節經傳諭查拏何以尚未奏覆該犯係創立邪教首犯斷不可任其免脫務須速飭跣獲解京審明嚴辦毋稍稽延

丁酉

上命軍機大臣傳諭舒赫德曰此次辦理剿捕賊匪諸事舒赫德實力宣勤調度妥協時值冬令天寒著賞給御用貂尾冠一頂黑狐馬褂一件由驛發往俾資

禦寒以昭優眷

同日

上諭內閣曰據舒赫德等奏此次帶往山東隨同辦事之司員內閣侍讀永保刑部員外郎蘇楞泰塔琦均屬奮勉出力等語永保蘇楞泰塔琦均著交部議叙同日舒赫德阿思哈楊景素奏言本月十四日有革縣監生周曰璜投至臨清出首伊子周振東跟隨本莊王君弼打拳入教約定十月二十八日起

事并單開莘縣朝城陽穀等縣各莊同謀人姓名
臣等反覆詰問祇云我止此一子恐將來干連是
以出首竊思周振東如果係王倫一教則前者王
倫滋事之時自應同惡相濟約齊舉事何必待至
十月二十八日始行動手似非與王倫一事但以
親父出首親子于情理又屬可信看來周振東係
一游手好閒之徒平時學習拳棒呼朋引類相聚
作奸或欲看王倫之起事如何再行舉動故約期

較遲或周曰璜本係黨內之人以官兵查拏嚴緊恐將來自干重罪并累及全家故爾先時呈告亦未可定莫若將周振東及單開為首之犯先行拏獲一經嚴訊即可得此案底裏臣等即於本夜密派文武各員帶兵分往各路約定時刻立拏首犯飛送臨清審訊若輩即有陰謀而先事擒拏自能一時就縛但此事若確將來辦理必須兵力而京兵已撤難以再行調回查現存兵數尚有京兵二

百七十名青州滿兵六百名山東綠營兵二千餘
名西河岸之直隸河南兵各二百名俱尚未起身
暫行留駐統計尚有三千餘名如果有需用之處
即可調撥臣一面密咨周元理何燭令各密備兵
一千選派大員統領在臨清館陶暫住以備調遣
接應之用至此案根底一俟拏到為首各犯詳加
研鞫即可酌量情形辦理奏入

上命軍機大臣傳諭舒赫德阿思哈楊景素曰據奏革

縣監生周曰璜首告伊子周振東與同縣王家莊之
王君弼等及朝城陽穀冠縣等處人結黨謀反約定
十月二十八日起事開單呈守等語王倫一案甫經
勦戮懲創不為不嚴乃復有愍不畏死之徒敢作不
靖自取誅滅實出情理之外今舒赫德等一聞呈首
即派員四路擒拏俟要犯就獲嚴鞫自可水落石出
迅得實情至所需帶兵大員仍派伊琳那木扎爾前
往并添派鄂蘭蘇崇阿並諭知春寧將帶回東三省

善射手仍速帶同馳驛赴東聽舒赫德遣委此時要
犯諒已就擒必不至復成事釁若能不動聲色確訊
嚴懲尤為妥善至周曰璜忍於首告伊子父子天性
苟非深明大義滅親之故者安能出此况據詰訊周
曰璜之妻並非後娶何忍陷其子以凌遲重辟或其
家庭之間別有曖昧情節一經拘到各犯不可不詳
細質訊以成信獻

同日署天津鎮總兵永昌奏言查天津各營兵八

百名調赴東省進勦並臣帶兵四百名於故城景
州一帶堵截逆業經

奏明在案臣遵照督臣周元理調遣移駐鄭家口防
範堵截嗣因賊衆猝至河西衝擊官兵屯劄之處
經督臣周曰理奏派前往油坊一帶相機接應仰
仗

皇上天威逆匪勦滅當敗殘之餘恐其浮水西竄臣復
帶兵前往臨清西岸與督標正定官兵分佈河干

合力堵擒今奉大學士舒赫德傳令進勦官兵次第回營臣仍於故城景州鄭家口直東交界地方酌派附近協營官兵巡緝逸匪所有原派進勦並策應各兵於十一月十一日帶領分起各回本營奏入

上諭內閣署天津鎮總兵永昌帶兵在油坊一帶接應並往臨清西岸堵擒賊匪其所派天津鎮總兵經大學士舒赫德帶往得力得力是永昌此次辦事尚屬

奮勉著照萬朝興等之例一體交部議叙

戊戌

何燭奏言查張百祿在遂平傳教一節該犯係王
倫義兒又係孟燦外甥實為河南倡教賊首今既
將該犯拏獲其在遂平所收之十五徒弟及孟燦
女婿皆可跟尋著落臣先於拏獲張百祿時飛飭
陳州府知府孫栢將容留張百祿之堂叔張洪功
訊據乾隆三十六年七月內有張百祿之母舅孟

二往遂平路過太康伊曾投拜為師學習八卦拳
並授運氣訣又供出太康人李天木係張百祿徒
弟又有遂平人張成章張榮章張大章趙雲會俱
從張百祿學習拳棒經各該縣先後拏獲等情臣
查孟二是否即係孟燦現在飭司確查孟二曾於
三十六年到豫傳教近年以來張百祿又來往其
間招徒聚衆情偽百出臣現飭南汝道道南陽汝
寧兩府帶領妥幹員弁會同營員各於交路交界

不動聲色慎密堵截其有供出逆黨及實係邪教人犯即按名指拏不留餘孽以無負

聖主諄諄訓戒之至意

同日又奏言竊照東省賊王倫肆擾一案豫東接壤恐有竄逸之賊潛藏境內先經拏獲東省逃匪孫敬等稟報到臣當即提犯到省嚴行查辦茲據署布政榮柱訊據孫敬供敬係壽張快役派在南門巡查於王倫等擁衆進城時躲入城濠被逆

匪和尚廣標搜獲脅令當探馬巡城乘間逃出約
同堂弟孫羊兒又同東阿李大成至泌陽投伊兄
孫秀儒避匿等語又據劉甫貴供在臨清瓜查莊
居住九月初八日隨賊進城賊首王倫在禮拜寺
點名將我撥給賊目楊進忠管束給了一桿槍同
去攻城又派在頭間把守到二十三日我合同村
的蕭利連夜跑走蕭利往直隸一路去了等語查
劉甫貴一犯已經供認從賊不諱併究出該犯同

莊順賊之李法玉趙士秀趙士英姜二小歐七趙
新及同守閘口之壽張賊匪王振海王振江徐何
王六等姓名其孫敬亦係先曾從賊後復脫逃情
罪已屬重大但賊匪跡同鬼蜮遂平等縣現有張
百祿傳教歸太又有往河南之說孫敬一犯即係
存泌陽地方拏獲且充賊營探馬出城安知非王
倫遣來勾引奸夥前往接應必須徹底根究臣現
在星速回省督同該司等親加訊究辦理其已據

各犯供出之僧廣標等犯現在飛咨山東直隸督撫臣一體查究奏入報

聞

上命軍機大臣傳諭舒赫德阿思哈周元理何燭楊景素曰要犯張百祿業經豫省拏獲解京所有該犯供出案内各犯並當飭屬查拏訊究如豫省成功會之類即係邪教一流何燭現在作何辦理至河南拏獲壽張孫敬臨清劉甫貴二犯自應訊明照例嚴辦其

各犯供出山東各縣人犯業經何燭飛咨山東各縣
兩省分緝務須上緊緝獲毋任紀綱就現在供出各
犯而計如和尚廣標逼脅孫敬入夥又劉甫貴供出
之頭目楊進忠並著舒赫德等查明如尚未就擒亦
著嚴緝到案從重審究此外尚有孫敬供出同逃之
東阿之李大成及劉甫貴供出同村順賊之李法玉
趙士秀趙士英姜二小歐七趙新俱臨清瓜查莊人
又同守閘口之王振海王振江王六俱壽張縣人以

上各犯俱著舒赫德楊景素等即速按名嚴拏務獲分別審辦又劉甫貴同莊之蕭貴係于二十三日同逃前往直隸亦著周元理上緊嚴緝審究

同日舒赫德阿思哈楊景素奏言前據高唐汶上等州縣所獲人犯臣等提赴臨清審訊內姜捷楊懷禮趙珠李璽郝之廣公振山張興陳興魏宗彥等九犯訊係隨范偉孟燦王聖如等打仗殺人把守口子并為賊買辦食物搶擄草束情罪俱屬

可惡應即行正法其姜捷係壽張營兵仍在本營
梟首俾綠營兵丁知畏至周釋徐桐張五劉宣滕
有生李君祿等六犯雖訊據供稱為賊喂馬做飯
並無打仗殺人情事但為賊供役亦未便輕縱應
發極邊烟瘴充軍奏入報

聞

同日又奏言查藩司國泰等訊取賊犯殷文等七
名供詞錄報臣等復親加查訊據殷文供係臨清

州人遇賊人裹住給與鑣刀曾在杏園打仗又據
趙有供係堂邑縣人曾經入教從堂邑跟到臨清
杏園打仗又攻過臨清城兩次等語以上二犯情
罪可惡應請

旨即行正法其趙功趙玉王大力陳洪先李成等五犯
均供認為賊供役應請發往黑龍江寧江塔等處
給披甲人為奴奏入報

聞

同日又奏言前奉

諭旨將舊城街巷肅清妥辦仰見我

皇上睿慮周詳體恤民隱之至意臣等連日派委員弁

前往所有街衢巷口及焚燼所餘之牆屋內逐一

檢查並於城外隙地刨挖大坑將賊屍悉行投入

現在土城中街道俱已肅清而舊時流散之民亦

陸續來歸漸次復歸現據副將烏大經稟報自初

三日起至十五日止回來民戶共查有七千七百

七十九戶計男女大小共四萬零七百名奏入報聞

臣等謹按臨清舊城自逆匪撲滅境內救寧良民避賊遠竄者咸得各安故宇

皇上厯念無傷時以一夫失所為慮屢

命肅清衢路撫卹流亡勞徠輯寧之道纖悉具備是甫旬日間復業者幾及萬戶茆簷土銍生聚依然編氓感戴

深仁靡有窮極詎一時之淪肌浹髓已耶

同日又奏言查王倫家屬屬前就現據獲各犯
審明確實問擬緣坐奉

旨允准在案惟是賊匪聚黨肆惡隨地迫人入夥故自
搜捕以來所獲幼女幼孩又有五百五十二口自
應區別辦理臣等公同酌議凡王倫義兒及受封
偽官有名頭目並殺官搶船各犯情罪重大其家
屬自應緣例緣坐今審得閻艾氏等三十五口或

係逆匪眷屬或係賊目親支俱應照例給功臣之家為奴又閩吉仁之子慙小兒前經奉

旨與王經之子正月兒俱于拏獲時即行正法續因王正月兒年僅二歲奉

旨交刑部監禁今慙小兒年僅七歲似應一例交刑部監禁如蒙

俞允臣等當同應行緣坐之犯一併解京辦理再此外有被誘入夥聽賊主使而家口現在拘繫者又有

實係平民全家為賊擄去事後自行投出經官兵
拏獲者其婦女幼孩五百一十六口俱審明非要
犯妻孥應請概行釋放奏入報

聞

同日又奏言前據原任撫臣徐績等陸續解至各
犯臣等覆加審核徐王柱王有德郭延正郭延繼
四犯俱係緊要有名賊自必當解京備訊此外王
措王林俱係王倫有服弟兄雖未隨同入夥而起

事之後並未舉發范宗孔從梵偉打仗授為校尉
官龐立入教從賊打仗殺人徐本道由陽穀隨至
臨清從賊日久劉得係開城引賊劉煥之堂弟且
曾隨賊打仗以上六犯俱法無可貸即行正法其
劉大信呂實陳宗武楊瑞吉四犯雖俱係被賊脅
從並未跟同打仗然已為賊使役又郭延禧係賊
中偽官郭延正之兄亦未可輕宥均應發極邊烟
瘴充軍又蘇小五一名於九月初六日被賊裏去

初七日即逃出並無為賊驅使情事相應釋放奏
入報

聞

同日又奏言臣等於九月二十三日圍勦逆匪以
來所有搜獲物件除劈山礮一位鳥機鎗二桿鳥
鎗四十一桿已歸營備用其長槍義斧鉤鑷鐵尺
棍等物二百零七件大小刀三百三十七口現交
署臨清州知州李濤存貯庫內又馬三十五匹騾

六頭衣服雜項等物一百八十一件臣楊景素委員確估變價歸於賑恤項下動支奏入報

聞

己亥

舒赫德阿思哈楊景素奏言臣等屢奉

聖諭查究奸匪起事緣由查有無歉收加收加徵之事

臣舒赫德隨時留心探問已知王倫實係邪教謀為不軌續於拏獲賊營要犯研鞫俱供王倫自乾

隆十六起從張既成入邪邪教不敢露名後來因
伊父身故無人管束自三十六年間遂收起徒弟
至今已有三年凡入教之人轉相招引各處鄉落
愚民多有為其煽惑者至今八月望間王倫探知
遊擊趕福知縣沈齊義要差人嚴拏邪教王倫心
中畏懼遂倡說八月之後有四十五日大劫從我
都可得免於二十五日差孟燦到王經隆處傳人
起事并云二十八日有風雨是時正好動手至二

十七日王倫在黨家莊已有數百人王經隆在張
四孤莊亦聚有五六百人二十八日黑夜梵偉閭
吉仁先帶六七十人與城內入教之書役等約定
開放入城戕害知縣即於二十九日接王倫進城
王經隆亦來會合此二日內適值風雨所以人益
信服所過之處脅附日多等語此係質之歷犯所
供無不脗合乃王倫因邪教敗露畏拏起事之緣
由也前孟燦所供因年歲歉收地方官額外加徵

以致激變一說臣等於審訊別犯時即詳悉訪問從無有供及此者臣楊景素飭屬嚴訪亦查無其事實係孟燦一犯深恨地方官查拏嚴切欲架禍以洩私忿故於拏到日遂爾混供至山東年歲德州以北今歲初夏雖略有少雨之處入伏後亦漸霑足且與壽張等縣無涉壽張等縣實有八九成收穫前此逆匪搶掠各鄉米豆糧食所在多有此其明驗是饑民釀變之說盡屬荒唐臣等伏思

國家承平百數十年休養生息無所不周即地方間
遇水旱偏災我

皇上發帑賑粟蠲緩兼施薄海茅簷羣知愛戴況今年
山左並未歉荒小民具有天良亦何敢藉詞倡亂
至加額一說當此紀綱肅清之候即有不肖官吏
亦斷不敢妄為至此尤屬毫無影響臣等現奉
諭旨查詢山東果有歉收加派之事自應早為入

告嚴行辦理今訊之賊犯所供質之衆人公論無不謂

賊匪等因探知查拏邪教而起則其事實有確據
臣等謹據實覆

奏奏入

上諭內閣曰前因舒赫德奏訊賊黨孟燦在東省供有
今歲歉收地方官額外加徵以致激變之語賊供本
無足據但既有此言不可不徹底查究特降旨令舒
赫德同新任巡撫楊景素即行詳晰確查如其言果
實并重治徐績之罪今據舒赫德等覆稱賊匪王倫

起事之由實係邪教謀為不軌前孟燦所供歲歉加徵激變之說詳悉訪問毫無影響且別犯亦從無供及此者實係孟燦深恨地方官查拏嚴切欲架禍以洩私忿故爾混供況今夏德州以北雖略有短雨之處與壽張等縣之收成八九分者無涉前此逆賊搶掠各鄉米豆糧食所在多有是饑民釀釁之說實屬荒唐等語舒赫德阿思哈俱欽差大人楊景素又係新任巡撫與東省荒歉橫徵橫徵之事初無所庸其

迴護況徐績已經解任復有何情面隱徇而舒赫德等曾經查訪與有責成又豈肯稍為粉飾代其受過乎朕臨御三十九年遇有水旱偏災不惜多費帑金廣為蠲賑期不使一夫失所且因海寓久安人民繁庶思欲藏富於民俾益臻饒裕特普免天下錢糧者再普蠲各省漕糧者一幾不啻數千萬計朕愛民懷保之心數十年如一日此天下臣庶所共知者若地方雨暘稍或不時朕宵旰殷懷必多方詢問以通民

隱若各省旱潦不齊之事督撫奏報稍遲經朕訪察
得實輕則申飭重則議處皆有案可稽考從未有因
督撫諱匿災傷謂其能為國家惜費特加任用之人
此亦天下臣庶所共知者即如今夏山東得雨較遲
屢曾傳旨詢問經徐績將得雨州縣時日節次奏報
至各處霑透而止且其報雨之候或驗之鄰省報章
或證之總河奏牘悉皆脗合亦斷無能偽飾則舒赫
德等今日此奏謂山東並非荒歉益復可信又如豫

省秋成豐稔而何熠以信陽光山二州縣內水田獨被旱災奏請確勘妥辦此真不過一隅偏災何熠尚不敢壅於上聞朕亦即為之溫旨批答又於秋間江南外河老壩口黃水漲潰堤工山陽等四縣田廬被水即飭該督撫迅速堵築加意撫卹冀瀕水受災黎庶早就安恬曾因伊齡阿奏報被水情形硃筆批詢地方官辦賑卹事宜妥協否蠹役有因而牟利者否目下窮黎光景又如何詳悉速奏來今日伊齡阿奏

覆適至其摺具在不妨與衆共閱者而謂朕以民事
為重乎不以民事為重乎朕欲督撫稍為諱飾災傷
乎抑不許其諱飾乎乃李淑芳聞王倫叛逆之事即
妄云饑民聚處滋事是轉予亂民以藉口之端實不
知其是何肺腸彼時若早為宣示適足以長逆匪之
智且恐因而誘惑良民其悞更不知伊於何底及賊
黨要犯就獲解京命軍機大臣會同九卿科道在刑
部公鞠聞有御史蔣良騏就訊賊犯是否因災起事

並無有以災為對者朕復於紫光閣集衆親鞠命李
淑芳自問賊匪亦無以災對者是李淑芳前日之妄
奏衆心應共釋然至所云直省亦有饑民地方官在
盧溝橋攔截勿令他往范宜賓尋襲其說入告今年
天津河間等處原有偏災經周元理奏聞朕即諭撥
通倉米十萬石備賑借之用此可謂之諱災乎若云
盧溝橋攔截饑民朕即遣派侍郎高樸袁守侗帶同
李淑芳范宜賓前往良鄉及黃村東壩各處查看並

未見成羣乞食流民乃李淑芳等所目擊又有誰為
之隱飾乎設果有其事朕亦豈肯庇周元理而不治
其罪乎朕愛養斯民實時凜如傷之念不特饑饉災
沴常廛於懷如近日逆賊王倫敢作不靖戕害良民
所傷不少而被脅之人招諭未出首告者勦賊時亦
不免玉石俱焚之事朕每為之惻然已屢飭加恩優
卹而閭閻具有天良如清河縣士民至舒赫德軍營
以牛羊等物犒師其臨清舊城百姓避賊復歸者七

千餘戶數萬餘口聞有撫卹之詔無不感激涕零是
草野愚民尚知仰體誠求保愛之至意而李淑芳當
逆賊倡亂之初造作無稽之談轉欲為賊飾諱却過
實不得復比於人類即治以袒賊惑衆之罪亦所應
得但朕不肯因言民隱之事加罪科道惟是李淑芳
識見如此心術如此若令其復居言路實足為世道
人心之害李淑芳著以部屬改用並著將舒赫德等
節次奏摺朕今日之旨及自五月以來詢問徐績論

旨及其覆奏之摺周元理何燭等查辦偏災並伊齡
阿覆奏各摺一併令九卿科道閱看並將此通諭中
外知之

臣等謹按保赤誠求之隱

聖皇勤恤民瘼固無一時一事不上厯

宸衷其或暘雨稍愆水旱偶告為地不過偏隅而

周諮諄切不啻再三蠲賑頻施如恐弗及實為亘古未

有東省適遇歲祲斷無所容其諱飾且壽張等

邑俱查有八九分收成又安得饑民釀孽之事

即如

王師所至士民爭先犒獻一聞下

詔撫輯感激涕零凡在血氣心知之屬靡不仰見
宵旰殷懷直如

天地之無私覆載者而奸民卸罪之詭說與言官撫拾之
浮詞自可立辨其誣矣

同日舒赫德阿思哈楊景素奏言十七日申刻據

原派文武各員將周曰璜原呈單開各犯全數拏
獲解到臣等即提周振東研訊據供周曰璜是我
父親向來喜歡賭錢欠債甚多將家中糧食多抵
帳與人近日又欠李貴等帳目約定本月十五日
清還又要糶家中所剩糧食我祖母不依父親即
於十一日晚上騎驢出門家中四處打發僱夫去
找尋不想竟到這裏來首告謀反我實在並無此
事至王君弼係本莊保正我沒有跟他學過拳那

裏有什麼十月二十八日起事之說總是父親與我母親不和祖母因父親好賭不許他糶糧還債想是父親道是我在內攬掇所以將這沒影響的事來告我只求叫我祖母母親來一問就明白了等語臣等思周曰璜如果為債務挾嫌誣控亦應祇及索逋之李貴等何必首告伊子以圖洩忿況其所告之事實關重大人數亦多其中情節不可不徹底追究現在將拏到各犯逐一隔別審問一

面委員迅即拘喚周曰璜之母妻到案以備質証
至委員等赴各莊拏獲單開各犯時俱各隨到隨
拏並無抗拒情狀并查看各犯家中亦無不法物
件臣等看來該犯等即有滋事之處如周曰璜所
首者現在為首各犯俱已就獲自無虞生他變奏
奏入

上命軍機大臣傳諭舒赫德阿思哈楊景素曰前據舒
赫德等奏莘縣周曰璜出首伊子周振東謀反一案

彼時即以逆犯王倫之事甫經大加懲創縱有愍不畏死之徒亦未必敢復行蠢動或王倫詭裝焚死形跡潛逃煽誘愚民則不可知曾諭舒赫德等妥協查辦今據舒赫等奏所有周振東及為首各犯俱經拏獲到案訊之周振東據供係父周曰璜以性好賭錢糶糧抵欠祖母不依心疑是我在內攬掇即騎驢外出我並無糶糧買馬及跟王君弼學拳之事至單開各犯俱隨到隨拏並無抗拒情狀各犯家中亦無

不法物件等語其事實屬大奇今周曰璜之母既已
拘提俟到案一訊自可得實看來周曰璜竟是一極
荒唐之人此告毫無影響其前日派往之那木扎爾
等四人及春寧帶往之墨爾根等現已由驛六百里
加緊行文停其前往所有舒赫德暫留山東境之直
隸河南兵丁現在並無需用之處且天氣漸寒應即
令其各回該省原營當差舒赫德將此案問明後即
赴壽張趕福叫喚之應之兵俟辦畢辦畢再赴德州

查辦格圖肯所帶潰逃之駐防兵分別嚴拏重究辦
究德州一案舒赫德即起程回京

同日舒赫德阿思哈楊景素奏言臣奉

諭旨普洱鎮總兵薩靈阿家屬賃居臨清被傷過半殊
堪憫惻今其子廣寧及其三女尚存若係劉文學
設法保護則其家人尚屬可嘉即應查明獎賞臣
等即傳到薩靈阿家人李正據稱我主兒原任臨
清協副將陞任後因路遠家眷未經隨任就住在

臨清土城內九月初七日賊人進城我主母說女
流無處逃避不久自有官兵來除害所以總沒有
走至二十四日忽有賊多人打進門來主母就高
聲罵賊被賊把主母并婢女們拏去我趕去搶奪
被賊砍了一刀即時昏倒並不知主母下落那劉
文學不是家人因在一院居住認識那時家裏沒
有男人劉文學背了小主兒逃走遇著官兵就報
說是薩總兵家人帶著伊家裏女人在街上找著

主母屍首纔知道被賊殺害至於小主兒小姑娘
向來跟著小的女人賊人進來時小的女人說是
我兒子女兒賊人就沒有動手等語查薩靈阿之
妻罵賊被害頗明大義其李正之妻又能保護家
主子女實屬天良可嘉臣楊景素已量加獎賞奏
入得

旨劉文學亦應酌賞

欽定勦捕臨逆匪紀畧卷十四